



11 OCT, 2025

Cukai Karbon diperkenal tumpu sektor besi, keluli

Berita Harian, Malaysia



Cukai Karbon diperkenal tumpu sektor besi, keluli

Kerajaan turut laksana pembiayaan RM1 bilion bagi Skim Pembiayaan Teknologi Hijau



Kuala Lumpur: Cukai Karbon akan mula diperkenalkan tahun depan dengan tumpuan awal kepada sektor besi, keluli dan tenaga.

Bagi memastikan kecekapan pelaksanaan Cukai Karbon, mekanismenya akan turut diselaraskan dengan Dasar Pasaran Karbon Kebangsaan dan Rang Undang-Undang (RUU) Perubahan Iklim Negara yang bakal digubal.

Pelan Hala Tuju Peralihan Tenaga Nasional (NETR) juga terus dipacu pemain industri dengan sokongan Dana Peralihan Tenaga Negara RM150 juta.

Selain itu, Perdana Menteri, Datuk Seri Anwar Ibrahim, berkata Skim Pembiayaan Tekno-

logi Hijau, GTFS 5.0 dengan nilai pembiayaan RM1 bilion dibuka sehingga 31 Disember 2026 dengan insentif jaminan kerajaan sehingga 80 peratus bagi teknologi hijau sektor sisa dan jaminan sehingga 60 peratus bagi sektor lain seperti tenaga, air, pengangkutan dan pembuat.

“Bagi menyokong gaya hidup lestari, pemberian rebat diteruskan untuk pembelian kelengkapan jenis cekap tenaga kepada pengguna dan peniaga dengan peruntukan RM20 juta.

“Kerajaan bercadang supaya pelepasan cukai pendapatan individu sebanyak RM2,500 diperluas untuk merangkumi pembelian mesin runcit sisa makanan bagi menggalakkan gaya hidup lestari,” katanya.

Selain itu, ikhtiar melindungi khazanah flora dan fauna negara diteruskan, dengan RM250 juta Dana Ecological Fiscal Transfer



Mekanisme Cukai Karbon diselaraskan dengan Dasar Pasaran Karbon Kebangsaan dan RUU Perubahan Iklim Negara.

(EFT) untuk menyokong peranan negeri memulihara khazanah alam.

Lindungi habitat terancam

Kerajaan juga bersetuju RM50 juta dana EFT disalurkan sebagai hasil kepada kerajaan negeri.

Sebanyak RM80 juta diperuntukkan untuk 2,500 renjer komuniti melindungi hutan, dengan kepakaran lebih 1,000 Orang Asli dan hampir 700 veteran akan dimanfaatkan, selain dibekalkan peralatan rondaan bagi meningkatkan keupayaan melindungi habitat terancam seperti Harimau Malaya, Orang Utan dan banteng.

Pada masa sama, RM300 juta untuk merawat, menyelenggara dan membersihkan sungai, termasuk RM10 juta Denai Sungai Kebangsaan bagi membangun laluan riadah dan memupuk tanggungjawab komuniti melindungi kelestarian sungai.



Ikhtiar melindungi khazanah flora dan fauna negara diteruskan.